

不可憎也貴之不可喜也自其資而甯之弗敢極也敢極卽失至樂矣

老君曰所謂聖人者因時而安其位當世而樂其業夫哀樂者德之邪也好憎者心之累也喜怒者道之過也故其生也天行其死也物化靜卽與陰合德動卽與陽同波故心者形之主也神者心之寶也形勞而不休卽蹙精用而不已卽竭是故聖人尊之弗敢越以無應有必究其理以虛受實必窮其節恬愉虛靜以終其命無所疏無所親抱德養和以順於天與道爲際與德爲隣不爲福始不爲禍先死生無變於己故曰至人卽神以求無不得也卽神以爲無不成也

道藏輯要

雲笈七籤
十一

聖

井集四

守仁第四

老君曰輕天下卽神無累細萬物卽心不惑齊死生卽意不懼同變化卽明不眩夫至人倚不立之柱行無關之塗稟不端之府學不死之師無往而不遂無至而不通屈伸俯仰抱命而行宛轉禍福利害不足以患心夫爲義者可迫以仁而不可劫以兵可止以義而不可眩以利君子義死不可以富貴留故爲仁義者不可以死亡恐也况於無爲者乎無爲卽無累無累之人以天下爲量夫上觀至人之論源道德之意以考世俗之行乃足薄也

守節第五

老君曰尊勢厚利人之所貪也比之身卽賤故聖人食足以充
虛接氣衣足以益形蔽寒適情辭餘不貪多積清目不視靜耳
不聽閉口不言委心不慮棄聰明反泰一休精神去知故無好
無憎是爲大通除穢去累莫若未始出其宗何爲而不成故知
養生之和者卽不可眩以利通乎外內之府者不可誘以勢無
外之外至大無內之內至貴能知大貴何往而不遂也

守易第六

老君曰古之道者理情性治心術養以和持以適樂道而忘賤
安德而忘貧性有弗欲而不拘心有弗樂而不有無益於情者
不以累德不便於性者不以滑和縱身肆意度制可以爲天下
儀量腹而食度形而衣容身而遊適情而行餘天下而弗有委
萬物而弗利豈爲貴賤貧富失其性命哉若然可謂能體道矣

守清第七

老君由人所受形於天者耳目之於聲色也口鼻之於芳臭也
肌膚之於寒溫也其情一也或以死或以生或爲君子或爲小
人其所以爲制者異也神者知之源也神清卽知明知者心之
府也知公卽心平人莫鑒於流水而鑒於澄水者以其清且淨
也故神清意平乃能制物之情故用者必假之於弗用也夫鑒
明者塵垢弗汙染也神清者嗜慾弗耽著也故心有所至神旣
然之反之於虛卽消鑠滅息矣此聖人之游也故治天下者必